

Nunatta avataaniit Nunatsinnut angalanermi piumasaqaatit pillugit Namminersorlutik Oqartussat nalunaarutaat (Immikkoortoq 2)

Nappaatit tunillaassortut akiorniarlugit iliuitsit pillugit Inatsisartut peqqussutaanni nr. 20, 12. november 2001-imeersumi, nappaatit tunillaassortut akiorniarlugit iliuitsit pillugit Inatsisartut inatsisaatigut nr. 1, 1. april 2020-meersukkut allangortinneqartumi, §§ 6, 6 a, 12 a, 12 b, 12 c, 21 a aamma 21 b aamma § 29 imm. 2 malillugit aalajangersarneqarpoq:

Atuuffi

§ 1. Nalunaarut Kalaallit Nunaannukartunut atuutissaaq.

Atuuffiata killilerneqarnera

§ 2. Nalunaarummi matumani aalajangersakkat ilaat tamarmilluunniit inunnut inuiaqatigiinnut pingaarutilimmik sulialinnut atuutsinneqassanngitsut aalajangerneqarsinnaavoq.

Imm. 2. Inunnut Kalaallit Nunaanni Politiini sulisunut Kalaallit Nunaanni Politimesteri imm. 1 naapertorlugu aalajangiisassaaq.

Imm. 3. Inunnut Issittumi Sakkutooqarfimmi tassanilu immikkoortortaqaqarfinni sulisunut Issittumi Sakkutooqarfimmi pisortaasoq imm. 1 naapertorlugu aalajangiisassaaq.

Imm. 4. Inunnut Peqqinnissaqarfimmi sulisunut Nunatsinni Nakorsaaneqarfik imm. 1 naapertorlugu aalajangiisassaaq.

Imm. 5. Inunnut imm. 2-4-mi taaneqanngitsuni sulisunut, Nunatsinni Nakorsaaneqarfik imm. 1 naapertorlugu aalajangiisassaaq. Tamatuma saniatigut Nunatta Nakorsaaneqarfia qinnuteqarnikkut inunnut inuiaqatigiinnut pingaarutilimmik sulialinnut § 7-imit immikkut akuersissuteqarsinnaavoq.

Imm. 6. Nunatsinni Nakorsaaneqarfiup nalunaarummi matumani aalajangersakkat ilaat tamaasaluunniit peqqinnissaqarfimmi katsorsarneqartunut atuutinneqassanngitsut aalajangersinnaavaa.

Imm. 7. Angalasut Covid-19-imik nappaateqareersimanertik uppersarsarsinnaappassuk §§ 3 aamma 7 taakkununga atuutissanngitsut Nunatsinni Nakorsaaneqarfimmiit aalangerneqarsinnaavoq. Angalasut aallarnissaq sivikinnerpaamik ullunik qulinik sioqqutsillugu uppersarsaatissanik nakorsaaneermut nassiussissapput. Immikkut akuersissuteqarnissaq akuersissutigineqarpat qinnuteqartoq aallartinnani allakkatigut uppersarsaammik nakorsaaneermiit tunineqassaaq.

Imm. 8. Meeqqat aqqaneq-marluk ataallugit ukiullit §§-ini 3-mi 7-imilu ilaatinneqanngillat. Meeqqat aqqaneq-marluk ataallugit ukiullit § 6, imm. 1-imi allatorneqarsimasut avataannut illoqarfinnut

nunaqarfinnullu allanut angalasinnaapput angalaqataat taamaaliorsinnaappat.

Angallammi Kalaallit Nunaannukartussami ilaasunut piumasaqaatit

§ 3. Angalasut Covid-19-imik nappaateqannginnerminnik uppersaammik takutitsisut kisimik timmisartumut Kalaallit Nunaannukartussamut ilaaqusaapput. Oqaaseqatigiinni siullermi taaneqartup naammassinninnissaa angallatip piginnittuata akisussaaffigaa.

Imm. 2. Covid-19-imut misiligut napparsimmavimmi peqqissaavimmiluunniit assigisaanilu Nunat Avannarliit ilaanni suliarineqarsimassaaq Kalaallillu Nunaannut aallarnermi ullut tallimat (akunnerit 120-t) sinnerlugit pisoqaanerussanngilaq.

Imm. 3. Covid-19-imut misiligungmi piumasarineqartut Nunatsinni Nakorsaaneqarfimmit aalajangersarneqartut naammassineqarsimassapput.

Imm. 4. Nunatsinni Nakorsaaneqarfik imm. 1-imik 2-millu immikkut akuersissuteqarsinnaavoq.

Umiarsuarni il.il. Kalaallit Nunaannukartussani ilaasinnaanermut piumasaqaatit

§ 4. Umiarsuit ilaasartaatit, matumanilu takornarianik angallassissutit Nunatsinnukartigatik ulluni kingullerni 14-ini nunat allat umiarsualiviini imaluunniit Savalimmiuni umiarsualivimmi tulaqqasimappata allatulluunniit iliornikkut ilaasunik ikiffigineqarsimappata Nunatsinni tulassinnaanngillat. Inerteqqussut nunap immikkoortuanut tamarmut atuuppoq, matumanilu imartamut, taamaattoq nunat tamalaat akornanni pisussaaffit ataqqillugit. Oqaaseqatigiinni siullermi aappaanilu taaneqartup naammassinninnissaa angallatip piginnittuata akisussaaffigaa.

Imm. 2. Umiarsuit ilaasartaatit, matumanilu takornarianik angallassissutit Nunatsinnukartigatik ulluni kingullerni 14-ini nunat allat umiarsualiviini imaluunniit Savalimmiuni umiarsualivimmi tulassimangitsut § 3-mi, § 6, imm. 2-mi aamma § 7-mi ilaatinneqanngillat, nunalli tamalaat akornanni angalaartut pillugit aalajangersakkanut ilaatinneqarlutik.

Imm. 3. Imm. 1 aamma 2 angallatinut nuannaariartaatinut aamma atuupput. Nunatta Nakorsaaneqarfia tassannga immikkut akuersissuteqarsinnaavoq.

Imm. 4. Imm. 1 aamma 2 umiarsuarnut aalajangersimasumik aqquteqarlutik Nunatta umiarsualiviinut akulikitsumik tulattartunut taakkunanngalu avalattartunut atuutinngilaq.

Timmisartut Nunatsinnukartut paasisutissiisussaataitanerat

§ 5. Angalasut Immersugassamik Sumut-mik immersuisimasut kisimik timmisartumut Nunatsinnukartussamut ilaaqusaapput. Angalasoq Immersugassamik Sumut-mik immersuisimanermut nassiussisimanermullu uppersaammik timmisartumi sulisumut timmisartumut ikinnginnermini takutitsissaaq. Oqaaseqatigiinni siullermi aappaanilu taaneqartup naammassinninnissaa angallatip piginnittuata akisussaaffigaa.

Illoqarfiit nunaqarfillu Nunatsinnukartunut killilersuiffunngitsut

§ 6. Illoqarfinni nunaqarfinnilu tulliuuttuni Nunatsinnukartunut killilersuiffunngilaq:

1) Avannaata Kommuniari:

a) Ilulissat. 2) Kommune Qeqertalimmi:

a) Aasiaat.

b) Qasigiannuguit.

c) Qeqertarsuaq.

3) Qeqqata Kommuniari:

a) Kangerlussuaq.

b) Maniitsoq.

c) Sisimiut.

4) Kommuneqarfik Sermersuumi:

a) Nuuk.

b) Paamiut.

5) Kommune Kujallermi:

a) Narsaq.

b) Narsarsuaq.

c) Qaqortoq.

Imm. 2. Taamaattoq nunatsinnukartut tikiffissami tungaanut qanermut assiaquteqassapput.

Oqaaseqatigiinni siullermi taaneqartup naammassinninnissaa angallatip piginnittuata akisussaaffigaa.

Tikiffissat ilaannut angalanermi mianerisassat

§ 7. Nunatsinnukartut § 6, imm. 1-imi illoqarfiit, nunaqarfiit imaluunniit najukkamit allamit ukioq naallugu najugarineqartumit angalasut tassunnaqqusaanngillat Covid-19-imik tunillatsissimanninnermut uppersarsaaqqaartigatik.

Imm. 2. Inuit imm. 1-imi pineqartut Nunatsinnut tikereernerup kingorna ullut tallimassaani kingusinnerusukkulluunniit Covid-19-imik napparsimanermut misissortinneqarsinnaapput. Misissortinneranni tunillatsissimangitsut paasineqarpat inuit Covid-19-imik tunillatsissimangitsutut naatsorsuutigineqassapput angalaqqilersinnaallutillu.

Imm. 3. Misissuinermi nappaammik nassaartoqarpat inuk pineqartoq tamanna pillugu malittarisassat nalinginnaasut malillugit katsorsarneqalissaaq, takuuk Nappaatit tunillaassortut akiorniarlugit iliuutsit pillugit Inatsisartut peqqussutaat.

Imm. 4. Inuk Covid-19-imut misilitsinngikkuni angalaqqissanngilaq pineqartoq ulluni 14-imi Nunatsinneereerluni Covid-19-imillu tunillatsissimanermik ersiuteqarani angalaqqilersinnaavoq.

Tunillatsinnissamut aarlerinartorsiorfimmii Nunatsinnukartunut malittarisassat (Nunat killilersuiffusut)

§ 8. Nunatsinnukartut ulluni 14-inik sioqqutsillutik Savalimmiuniissimasut imaluunniit Nunanut Allanut ministeriaqarfimmit angalanermut ilitersuutaanni Nunat killilersuiffusuniissimasut katerittarfinni, aqqissuussinerni, pisussani il.il. peqataassanngillat § 7, imm. 2 aamma 4 naapertorlugit Covid-19-imik tunillatsissimanninnermut uppersarsaaqqaaratik. Matumani illup iluani, silami, pisortat inuillu katerittarnerat, aqqissuussinerit pisussallu il.il. pineqarput.

Imm. 2. Pisortat suliffeqarfutaani assigisaanilu isersimanermut, inuussutissarsiortut inigisaanni tamanut ammasuni isersimanermut aamma pisortat namminersortullu utoqqarnik paaqqinnittarfinut napparsimavinnulluunniit isersimanermut inerteqqussut aamma atuutinneqassaaq. Taamaattoq ulluinnarni nioqputissanik pisiniarnerit allatullu pisariaqavissumik pisiniarnissat allanit isumagineqarsinnaangitsut isumaginissaat akuerineqarput .

Imm. 3. Inerteqqut illoqarfinni nunaqarfinnilu § 6, imm. 1-imi taaneqartunut aamma atuuppoq. Angalasut taakku § 6, imm. 1-imi illoqarfiit nunaqarfillu taaneqartut avataannut angalaqqusaanngillat § 7, imm. 2 aamma 4 naapertorlugit Covid-19-istik tunillatsissimanginnermut uppersaaqqaaratik .

Imm. 4. Peqataasut taamaallaat inoqutigiiuppata imm. 1 inissiamut atuutissanngilaq.

Imm. 5. Immikkoortut 1 aamma 2 katersuunnernut politikikkut allatulluunniit isummernissamik siunertalinnut atuutinnngillat.

Pineqaatissiissuteqartarneq

§ 9. § 3, imm. 1, § 4, imm. 1-3, § 5, § 6, imm. 2, § 7, imm. 1, 2 aamma 4-mik aamma § 8, imm. 1-3-mik unioqputitsisoq pinerluttulerinermik inatsit malillugu pineqaatissinneqarsinnaavoq.

Imm. 2. Ingerlatseqatigiiffiit il.il. (inatsilerinermi inuttut immikkoortutut isigineqartut) pinerluttulerinermik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

Imm. 3. Akiliisitsissutit Nunap Karsianut tutsinneqassapput.

Atuutilerfa

§ 10. Nalunaarut saqqummiunneqarneraniit atuutilissaaq. Tamatuma peqatigisaanik Nunatta avataaniit Nunatsinnut angalanermi piomasaaqatit pillugit Namminersorlutik Oqartussat nalunaarutaat nr. 27, 21. juli 2020-meersoq (Immikkoortoq 2) atorunnaarsinneqarpoq.

Imm. 2. Nalunaarut malillugu killilersuinerit, inerteqquteqartitsinerit, peqqusinerit il.il. 31. december 2020 tikillugu atuutissapput.

Namminersorlutik Oqartussat, ulloq 10. august 2020

Anna Wangenheim

/

Tine Pars

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut